



Sesida dals

24 d'avust 2020

Communitgà ils

31 d'avust 2020

Protocol nr.

685

Incumbensa da la fracziun da la PCD

concernent ils fatgs ch'ins ha emprendì da la pandemia COVID-19

Resposta da la Regenza

La pandemia COVID-19 è ina sfida gronda e nova per il stadi e per la societad. La-tiers tutga er ch'ils organs dal stadi, en spezial ils parlaments, ed ils process demo-cratics n'han betg pudì funcziunar durant la fasa acuta da la crisa sco durant la situa-ziun normala. La situaziun ha pretendì che oravant tut las autoritads executivas da la Confederaziun e dals chantuns han stuì, per part sa basond sin il dretg d'urgenza ch'è previs explicitamain dal dretg costituziunal per cas da crisa extraordinaris (art. 185 al. 3 da la Constituziun federala; CS 101, art. 48 da la Constituziun dal chantun Grischun; DG 110.100), concluder las regulaziuns e prender las mesiras necessarias per dumagnar la crisa.

Igl è evident ch'i èn dumandadas ed obligadas – fin ad in tschert punct – oravant tut las autoritads executivas durant crisas acutas. L'instrumentari dal dretg d'urgenza che l'autorità constituenta metta a disposiziun a l'executiva per emprimas mesiras en cas da talas crisas extraordinarias è sa cumprovà ord vista da la Regenza. El pussibilitescha da reagir en moda svelta ed adeguata sin las sfidas che sa mussan e che sa midan per part andetgamain. En in stadi democratic èsi però d'ina impurtanza centrala che la cooperaziun dals parlaments, sco autoritads supremas, e dal suveran na vegnia betg engrevgiada u schizunt bloccada sur in temp pli lung. Sut quest aspect èsi impurtant d'analisar conscienziusamain il dumogn da la pandemia COVID-19 che dura anc e da controllar, sche e tge conclusiuns che pon vegnir tratgas da quai.

Correspondentamain ha la Regenza lantschà gia ils 19 da matg 2020 in process cumplexsiv per in'elavuraziun posteriura, integrond tut ils departaments cumpetents, la Chanzlia chantunala ed ils posts da servetsch. Sa basond sin quai duai silsuent vegnir elavurada – per proteger la populaziun dal chantun Grischun – ina planisaziun da mesiras en cas d'ina pandemia che tegna quint da las ristgas. Las dumondas exprimidas en l'intervenziun qua avant maun davart l'abiltad d'agir da la Regenza e dal Cussegl grond sco er davart la cooperaziun dals differents plauns statals (chantun, regions e vischnancas) en situaziuns da crisa fan part da las dumondas che duain vegnir elavuradas. En il rom da questa elavuraziun duain ellas vegnir analisadas detagliadamain, ed – en corrispondenza cun las enconuschientschas gudagnadas – duain alura vegnir proponidas en ina missiva al Cussegl grond las adattaziuns da las basas legalas che ston eventualmain vegnir fatgas.

Sa basond sin questas explicaziuns propona la Regenza al Cussegl grond d'acceptar questa incumbensa.



Il president:

Dr. Chr. Rathgeb

En num da la Regenza

Il chancelier:

Daniel Spadin